

2005

An dr Fasnacht trifft me d'Hofa-Häxä
mir sind eimolig und sicher nid z'verwächsle
triffsch is a denn hämmer zäme s'Fest
denn unsri Hofa isch immer no die best

Für Tutenchamun Ustellig isch me kreativ worde
s'het e neu Bier gäh und Chueche etc. vo allne Sorte
mir hän dr Bsuech in d'Ustellig verschobe
will alti Mumie hämmer jo au do obe

Über die Abstimmig duet me hüt no diskutiere
ob mir Secondos als Schwyzer wän akzeptiere
d'Schwyz het nei gseit dr Pass wämmer nit gäh
drfür dörfe si witterhin jede Scheissjob überneh

In dr Gmeinkasse hets momentan viel Kohle
do het sich eine dänkt die chani go hoole
im alte Archiv het er in dr dümmi es Füürli gleit
wieso het em niemerds dr Wäg zu mine Stüürunterlage zeigt

Unser letschtjööhrig Joorgang het e digge botte
mitem Traktor hän sie mehr gmacht als si hätte sotte
dr Schaade isch grusig ins Gäld inne gloffä
Mir hän ne gholpä und am Fescht fliessig e Stück Traktor ersoffä

S'Facelifting vom Berlusconi chunnt im Blick uf die erschti Site
mir finde uf däm Thema sött me nit meh ume ritte
mr bhalte lieber e Aug uf dr Andy vo dr Bärgratte obe
Im Fall dass är sich plötzlich unter de Palme im Baschtröckli duet ustobe

Mir hän scho welle e alte Bangg näh
Dir diend uns die Versuechig sicher vergäh
denn allbot über Kirchemuure dichte wird langsam schwer
drumm sin unseri Köpfli relativ leer

Dr Köhler isch do gsi im letschte Joor
richtig Tourischte hämmer do obe gseh das isch wöhr
zum Abschied dien mir ihm no winke
und sind froh duets im Dorf jetzt nüm so stinke

Für si blöds Gschnurr me chas chum glaube
duet dr Kilchsbrägger au no Gäld abstaube
wäre mir eini vo dene Misse gsi wo hätte miesse goh
hätt r vo uns sicher im verbiiläufe no eins uff d'Schnurre becho

De gohsh ine ziehsch e Nümmerli und stohsch emol aa
mängisch hets nid so viel Lüt und de chunnsch gli draa
nid uf dr Poscht simmer do mir wötte e Sitzig organisiere
und hoffe mer chönne s'Säali vom Stärneberg reserviere

D'Ettiger hän schwer ein an dr Waffle das isch e alte
sie schaffes jo chuüm e Maskeball abzhalte
das usgrächnet e Hofstetter muess hälfe isch zwar doof
Drfür bliebä sie wenigstents an däm Obä im eigenä Dorf

E Lifting das isch doch ganz toll
chasch gratis ha meint mi Alte los emol
ziehsch eifach ab hüt kei BH me aa
so eifach chasch dis Lifiting ha

Dr Murat Yakin isch ganz klar e Bild vomene Maa
e Mängj würd gärn so ein daheime ha
doch wenn d'jetzt mit em duschisch isch er nüm sone Tolle
an sim Knackarsch het er jetzt e Eiterbolle

